

四庫全書

集部

欽定四庫全書

集部

蘇魏公文集卷一至四

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣盧遂

謄錄監生臣施華

欽定四庫全書

集部三

蘇魏公文集

別集類二 宋

提要

臣等謹案蘇魏公文集七十二卷宋蘇頌撰
頌字子容南安人徙居丹陽慶歷二年進士
官至右僕射同中書門下平章事罷為集禧
觀使徽宗立進太子太保累爵趙郡公卒贈
司空魏國公事蹟具宋史本傳集為其子携

所編宋史藝文志陳振孫書錄解題皆作七十
二卷今本與之相合蓋猶原帙惟藝文志尚
載有外集一卷而今本無之則其書已佚也
史稱頌天性仁厚字量恢廓在哲宗時稱為
賢相平生嗜學自書契以來經史九流百家
之說至於圖緯陰陽五行律呂星官山經本
草無所不通葉夢得石林燕語亦載頌為試
官因神宗問暨陶之姓頌引三國志證其當

從入聲不當從洎音神宗甚喜是其學本博
洽故發之于文亦多清麗雄贍卓然可為典
則石林燕語又稱神宗用呂公著為中丞召
頌使就曾公亮第中草制又稱頌為晏殊諡
議以其能薦范仲淹富弼比之胡廣謝安又
稱頌過省時以歷者天地之大紀賦為本場
魁既登第遂留意天文術數之學陸游老學
菴筆記又引頌起草才多封卷速把麻人衆

引聲長之句以證當時宣麻之制徐度卻掃
編又稱頌奉使契丹文彥博留守北京與之
宴問魏收逋峭難為之語何謂頌言梁上小
柱名取曲折之義因即席作詩以獻今檢是
集凡諸家所舉各篇悉在其中足知完本尚
存無所闕佚而頌文翰之美單詞隻句膾炙
人口即此亦可見其槩矣乾隆四十六年六
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

蘇魏公文集卷一

宋 蘇頌 撰

古律詩

進南郊大禮慶成詩狀

右臣伏以禮行於郊由古謂之大事祭得其道先聖著
於格言皇帝陛下受命皇帝穹繼昭仁考爰初纂嗣不忘
丕承大報圜丘恭展三年之禮祇見宗廟遍祀八世之

靈至於朝享道宮肆赦端闕奉事長樂尊上冊文惟是
親行之儀莫非盛德之事上意專懇熙事備成宜有咏
歌被之金石臣幸塵詞館恭覩禮文思所以攄發精微
形容萬一愧無鴻筆藻潤之美徒有蕪音累句之慙出
於至誠不敢自蔽謹夙夜齋祓課成大禮慶成詩五首
繕寫隨狀上進干瀆宸嚴臣無任惶懼屏營之至謹奏
大禮慶成詩五首

惟宋五世將郊泰玄祇若前典欽崇道尊其日吉午天

時薄寒帝出齋寢朝神紫垣降輅就次被龍摺山禮薦
蒼玉樂歌太安酌以瓊醴羞以靈飧飭御來格上誠益
虔思我基命系於帝軒真祖膺符錫類貽孫皇繼其志

受祉彌繁炎炎景厯億萬斯年

右朝享
景靈宮

天命有宋系軒纂唐祖武宗文積厚流光奕奕清廟八
祐同堂五祀備饗百順儲祥皇帝孝思明發不忘躬執
圭瓚再薦嘉觴公卿陟降鼎俎芬芳廣樂九變羣神迪
嘗昭我先烈緝熙萬方永思繼述成不敢康始朝于廟

詩歌嗣王烈聖在天保佑我皇

右薦享于太廟

惟皇繼天宅位三禩靈德及遠嘉生茂遂仲冬月良一

陽氣至上將告成禮嚴肆類自廟徂郊萬靈拱衛天收

宿霧日麗佳氣月踰既望再登午陛對越蒼祇配以太

帝奠玉酌匏升烟燎幣志盡虔恭備成熙事玉輿旋衡

歡聲沸渭皇專乃誠下蒙厥惠

右有事于南郊

帝陟圜丘天降之祐嘉與士民均承福祚還御端闈躬

布皇度雞星驗占鵠書臚句慶浹天淵恩霏雨露滌垢

棄瑕蠲租薄賦三泉靡封五刑幾措太和充塞羣心率
籲自古無赦孰除詿誤我朝本仁實清弊數赦匪其私
仁則有裕萬民以懷邦基鞏固

右賜赦
宣德門

大孝尊親治本人倫自家之政所以刑民天正元日帝
郊畢禋將崇母儀爰即嘉辰正朝乾闥羽衛星陳金石
既作公卿荐臻帝步西序躬咨爾臣授以冊寶極其禮
文羣官在位靡不歡欣謂天子孝感于人神祝天子年

後于靈椿皇心匪懈聖度惟新

右發冊
文德殿

元日鴻慶宮朝拜二十韻

皇祐三年任南京留守推官

上國房心次仙都太紫微壁門開倣雉金闕立如翬昔
聖躬三祀乘時動六飛奠圭渦曲已鳴蹕渙陽歸孚號
興王澤尊名象日畿經營原廟制虔輦上天威祖系崇
軒鼎宗祊奉漢衣豫游恩甚盛謁款禮無違却顧和鸞
跡咸嗟歲序非璿源流永永堯德冠巍巍我后遵鴻烈
聲明極範圍乾坤扶寶歷日月拱琳扉朝會元正始班
聯內著依叙官風憲肅就列羽儀輝北面鸞分黨東隅

斗轉機寒銷冰玉砌風繞大龍旂瑞色花藏綠歡聲霧
散霏未竣真館集遙仰帝陽晞至治尤遐邈先猷重發
揮邦人徒望幸延首向端闈

恭和御製賞花釣魚

四照仙花次第開上林重覩屬車來雨晴馳道紆天步
風引濃香到壽杯瑞燕入簷時拂掠恩魚窺釣更徘徊
栢梁絕唱容賡綴獨愧非才亦與陪

恭和御製上元觀燈

元豐五年正月畢仲衍押
伴高麗賜宴樓下賜詩

寶杯蓮燭豔宮臺萬戶千門五夜開樓下舞韶清吹發
雲間鳴蹕翠華來九賓宴集占風使四近班陞構夏材
自愧周南獨留滯十三年隔侍臣杯

恭和御製賜太師致仕文彥博五言六韻詩一首
曉日清明霽華林物色新詔頒慈惠宴恩厚老成人袞
冕三川客杯觴四府臣獻酬同飽德愜樂盡含醇帝惜
營丘去民思尹氏均宸章一褒賁道不愧如仁

恭和御製賜太師致仕文彥博七言四韻詩一首

出處逢時道不殊當年功立老閒居來膺冕紱三公命
歸奉雲章五色書社稷元臣名已遂山河雄鎮寵仍疏
瓊林詔餞衣冠盛豈止都門百兩車

謝賜御書詩五言十二韻

聖學天攸縱宸文日又新因攜鏤牙管分賜挈囊臣王
几繙經暇瑤宮錫宴辰清躬忘盱食睿藻出絲綸才賞
唐詞客人稱賀季真開編掇風什灑翰落霜筠楷法前
無古書評妙入神良慙孤陋甚獲對寵光頻得異登牀

誚藏過韞匱珍護持同始卒荷戴等穹昊職幸聯簪筆
憂常念負薪惟勤黃卷業仰答大君仁

進皇帝初郊大禮慶成詩狀

右臣伏觀今月十四日皇帝躬祀南郊禮畢者三歲一
郊漢唐以來為定制二儀並侑祖宗之世皆親行蓋王
者謹於承天而經典重於饗帝國之大事茲實為先伏
惟皇帝陛下稟堯舜之聰明監夏商之忠敬明德恤祀
靡神而不宗精意曰禋無文而咸秩爰卜天正之吉躬

修郊見之儀前詔攸司聿遵先典內則稟訓于文母外
則詢謀于邇臣稽皇祐舊章既兩行于宗祀案熙寧故
事當合祭于圜丘尊泰元富媪之靈徧六宗羣神之祀
義兼聖孝禮盡情文瑄玉嘉牲合二精于志物黃鍾太
族備六樂于神祇煙燎配黎而四施休氣鬱葱而竟夕
膺萬壽而禔百福叢慶于三宮暢九垓而沂八埏覃恩
于庶物臣親逢熙旦叨領近司從警蹕之奔趨望廟丘
之陟降贊盛德之事雖莫究于儀形聽輿人之言輒載

賡于歌詠顧慙鄙俚難逭譴訶謹夙夜齋戒賦成皇帝
初郊大禮慶成七言二十韻律詩一首繕寫上進冒瀆
晁旒臣無任惶懼屏營之至謹奏

皇帝初郊大禮慶成詩

六帝貽謀聖繼明兩宮崇祀上躬行熙壇初展嚴禋報
觀盥三終孝享成仰法祖宗尊本始致隆高厚罄純精
告虔並薦圓方玉在滌交充繭栗牲吉土兆南殊漢時
景圭迎至協周正羽旄備物甘泉仗觚陛層垓委粟營

齋寢累朝思志意真廷穀旦奉梁盛八神警蹕毆氛沴
九貊梯航入貢菁過廟徂郊紆步武撤茵停蓋肅公卿
服裘尚質遵前製配冊修辭正重名篆鼎割烹工奏夏
午階登降斗旋衡先時非霧滋鱗隲竟夕祥光燭縵城
鐘虞四廂庭樂畢樵蒸千石燎煙輕龍回雕輦昇峽闕
鶴負恩書下采楹海外雞星占澤霈樓前鼉鼓震霆驚
風雲氣應靈臺候雷雨仁深犴圜清有昊感通欽輔德
聿修寅畏念持盈旁求遺逸搜巖穴寬舍租逋惠隸氓

卷一
天錫泰元神策瑞民歌華黍歲豐聲老臣扈從知何補
敢次輿言頌太平

恭謝慶成詩十韻

嘉祐元年九月代劉相作時二府皆有詩議者云皆不逮劉公

者公聞之曰某久不事筆硯此親倩蘇校勘所作也人嘉其不掩善

聖孝當天世繼明兩全能饗禮交行路朝躬款三年報

齋寢先端七日誠穹厚博臨通肝鬢祖宗嚴祀極專精

冕章從質更新製鐘虞鏗純復舊聲

先是命禮官重定衮冕制度務從簡

質仍詔用舊樂

舞佾前陳徽烈茂燎煙升達上儀成不祈厚福

歸諸已務達厯息及庶氓還御端闈宇大號載頒元厯
慶鴻名歡謠沸渭盈都輦協氣旁流浹海瀛百辟旅庭
紛嶽抃四方延首效葵傾帝心虔輦常無怠億萬斯年
享治平

蘇魏公文集卷一

欽定四庫全書

蘇魏公文集卷二

宋 蘇頌 撰

古詩

送鄭無忌南歸

我家本南閩處世若羈寓侍親從宦遊東西遷者屢因
循歷年載未識南中路間歲至都城始與里儒遇嘗聞
閩中奇英雋所叢聚山川降靈氣稟肖時魁梧往在祥

符中黃李稱獨步當時盛文物在廷充振鷺二子邁其
間軒軒並鑣驅得志何所如康莊躍騏驎時文變新律
高辭無累句人傳幼婦碑朝奏客卿賦奇器擅珪璧至
音有韶濩當宁喜同時士林爭景附淵澄或無魚木秀
乃生蠹嗟哉士之賢入朝嘗見惡叔才亦稍遷秘書觀
四庫命窮時不偶伶仃獨翁孺名雖鼎甲貴官止塵勞
污蹉跎三十年困躓卒顛仆伊予生後時舉頭徒企慕
鄭子乃其甥肖貌何穎悟讀書博而詳偉詞亦能鑄錫

來至京國首與予欸晤吾嘗念古昔人賢猶愛樹况遇
賢之出何必緣雅素從遊遂無間往來靡常度近遭試
秋官報罷不知故飄飄歎窮途歸橐不能具當路少知
已腹心誰可布我嗟近世人齷齪何足數見善不能舉
徒然用佻嚬士有處憂困豈嘗一蒙顧勸君自求已何
用頻齟齬還家樂詩書養心益堅固無因一傷手廼欲
改前措澤豹未成文尚能隱深霧齊禽戢其翼久亦蒙
傳羽去况子氣方剛丁辰年未暮勉勉信予言勤勤蹈

前趣更想渭陽賢懷道當有逆王忱希范甯羊曇宗謝
傳武子稱衛玠逢時廼騰鶩深源賞康伯傳經有訓註
子其慕斯人戒哉惇向素還來取高第擢俊膺帝顧更
發翁孺名後來益垂裕作歌送子行予言豈虛諭

送王秀才出京

都城大雪酒價高我送故人傾濁醪酒闌置杯欲話別
不覺中心生鬱陶丈夫聚散豈為念所歎人事多徒勞
憶昔我年未弱冠西來觀藝遊神皋金門獻賦嗟失路

因循四載何所遭京華碌碌少知己但聞嘲弄聲
今年詔書恤西事大開言路烝羣髦因思平生負
氣槩臨事始可觀持操長纓羈虜豈無計策慮未
獻心徒忉忉感君壯志正凌厲術業沈究鈐與韜
上書論畫兵家事直請西去親鞬橐又言若將衆
十旅可為手足除紛搔踰時待報不聞命西秦便
欲從遊遨束書攜劒暫然去却顧名利輕如毛我
謂方今正急士帝言屢下搜英豪公卿悉意奉詔
旨推賢好善如干旄勸君失意且韜養

有能必見時稱褒中朝列爵本馭衆進任將相皆儒曹
一時未遇何須歎吾輩豈久居蓬蒿

和丘與權秘校詠寶寄林成之進士

天下豈無寶此寶常曠乏渾然肖天質不與璆璠雜萬
產蓄精粹百靈常護押天王得而興人事留豈盍問將
安所施邦國憑鎮壓問誰能為售靡物可酬答孰嗟道
不行將以補千衲孰憂大厦摧用以支衆庠在昔夏及
周相繼登天榻搜索罄寰瀛異物悉歸狎萬玉會諸塗

九鼎安於郊人神為交歡海嶽在呼欲無遠不奔趨無
強不折拉區區霸者君猶能救收拔譬夫至音奏所聽
纔鞶韞晉強由一戰齊盛成九合小邦願輸幣鄰境求
盟軟至寶既見用光價日以洽豈若秦與趙爭璧相蹂
踏其下數十代交攻事矛甲月捨亦異道盛衰勢相沓
得之權綱震失之基本塌吾君系皇統威稜海隅匝大
器固神局衆奇萃緹匣山瑰及海靈盡獲諸羅罨揀金
磧礫中或不間砂蠟求珠淵泉底或見取麤蛤珉石尚

珍藏理寧斤珪珎其間偶棄遺誠堪為嗟歎或是選擇
殊非由道路狹淵哉二君言相投予意恰誰能借其辯
九重貢君闔上以啓聰明次以廣開納冀于涓塵中收
拾秘箱發明時寧自疑本無雙則法

送閻祕丞宰雩都

江西劇藩曰南康其山空青水貢漳環封千里十巨邑
邑皆萬室居相望地窮吳境雜楚粵民生窘急矜豪強
積姦疊訟狃成俗吏治紛擾多頽網緩其銜轡乃縱弛

繩以密網還滋彰中和之政固難立要在教化完隄防
爾來守宰尤慎擇長人之計非尋常儀儀閭君文且敏
風韻粹絜含珪璋昨從筦榷薦稱最就委墨綬雩川旁
周才治劇有餘地猶以驥騄騰康莊牛刀耒騶解衆理
排擊魯未嬰銛芒聲華早已擅朝宗羣公稱薦交封章
况今知己正當路拔擢賢俊登周行謂宜平步陟清要
何乃遠官天一方平時進人用資履詳試政事觀循良
毋嗟邑令尚沉滯昔賢為吏多踐揚漢庭卓魯終作輔

孔門言季俱升堂于時百里振嘉譽逮今史簡傳清芳
勉哉遠繼數賢迹坐使慈惠流江鄉政成績茂奏丹宸
行矣臺閣看徊翔

天禧寺竹

萬箇碧琅玕兩傍蔭潭沼叢深蔽巖麓幹直露雲表
影下交加山房上環繞昔嘗止鳴鳳今肯棲凡鳥笋抽
龍種瘦籜墜孫枝小美勝會稽箭珍逾汶陽篠兔園名
非奇渭川比終少樵刪草根變客玩茶煙燎創亭僧意

高諭佛禪心了吾愛有霜筠一到忘昏曉

一本云每來到霜筠愛玩

忘昏曉

寒食後一日作和林秀才

寒食初過一百五陌上風輕斂微雨宮花鋪繡淺深紅
蜀柳垂絲千萬縷都人士女趁時節郡圃山樊樂樽俎
肯教容易度春光來日清明更妍煦

暮春與諸同寮登鍾山望牛首

清明天氣和江南春色濃風物正繁富邦人競遊從官

曹幸多暇交朋偶相逢並驅出東郊乘興遊北鍾陟險
不蠟屐扶危靡搢笏上登道林祠俯觀辟支峯辭山次
阡陌長江遶提封蕭條舊井邑茂盛新杉松攬物思浩
浩懷古心顚顚念昔全盛時茲山衆之宗天門對雙闕
霸業基盤龍六朝遞興廢百代居要衝人情屢改易世
事紛交攻當時佳麗地一旦空遺踪惟有出岫雲古今
無變容

首夏即事與丘與權同韻作

朱曦漸永煩暑添薰風當晝飄前檐庭幽門邃寒帷簾
景物軒豁欣窺覘方池綠瑩波文恬兩傍森森生葦簾
新荷未展排青尖上下交映開鑑奩園林果實繁李探
原野麥秀勝稻穰羣飛衆走羽毛多求陰息影愁烹燭
江南鬱蒸非類疔時雖早熟人心慙忻忻笑語喧閭閻
言此豐歲將飫饜正陽用事何太廉乃使陰沴相陵磨
正當汗浹絺衣粘淒風忽生增續縑淫霖旬日橫流霑
市井郊郭皆渰淹林實墜落誰捨擗麻麥散亂如刪鎌

斯民愁嗟言成譖我時憂思坐間櫪方食不知味苦甜
整齊几案抽書籤發策一以天人占少陰乘陽時最嫌
小人當此多欺儉君子遇之難懷謙天道雖遠誠可瞻
上曰高明下沉潛四時中分寒與炎一氣不可相并兼
推本事理知悉纖災害所起由漬漸豈非姦孽當除殲
又非直道傷諛諛孰居鼎鼐調梅鹽孰任閭闔懷韜鈴
聖皇言動謀於僉布為利澤濡蒼黔將消浸沴頻深砭
感召沖氣安危阡嗟嗟直口不可鉗誰當一探龍頷髯

與諸同僚偶會賦八題

不期而會

汎交以勢利君子期久要道義苟契合出處無阻遙龍
興雲必從官鳴商亦調樂哉此席會固非夙相招

待燈

黃昏蝙蝠飛空堂蟋蟀吟相對語未闌不覺更漏侵呼
童持短檠注以蘭膏深皎皎見寒光良宵愜予心

坐久月初上

高軒微雨過初夕涼風生兀坐正幽寂雲間月華明移榻向寒堦遙望孤蟾清所思故人遠對此傷予情

邑署獨鶴

常賦士衡雲兼懷惠連雪庭前聞清唳天外見寒月舞愛素琴橫飢思朝露潔問爾誰為羣威鳳在丹穴

府庠小沼

面向秦淮流背枕清溪水當軒觀未足鑒沼近可擬月明練光寒風動漪漣起不用植菰蒲惟將鑒容止

華藏竹

竹性本孤潔況在祇園中經年蔭華宇永日吟清風
心虛大道合幹直賢人同雪霜任摧挫寒姿獨青葱

秦淮柳

古樹枕淮流橋邊與亭畔借問植秦堤何如在隋岸
南朝正佳麗綺陌多攀玩嗟今非昔時榮悴俱可歎

登賞心亭

秦淮接長江活活流不已高亭出城角四面盡湍水
山

川孤雲飛檻閣清風起望遠何所思故人在千里

與丘程凌林四君同賦食河豚

水族誠萬種茲魚非衆儔形扈而味異名與畜豕侔江
南春風和乘時沂江流貪婪爾之能腥臊固相投膨膨
逞怒腹駢駢競尖頭靡因梁笱獲謾污釜餌求虛傳百
金貴不充四時羞假以薑桂芼薦之尊俎酬飽飫有奚
適包藏乃為憂嗟予鄙異食顧此偏憎尤河魴風陳詩
蝦蟆譏柳州腊毒戒厚味茲言實嘉謀盍投會稽瘡更

垂渭濱釣一釣蓬山鼇復連東海鰕割鮮輕屠龍和羹
小函牛誰同厭若魚何必誇食鱖

遊保寧院練光亭同丘程凌林四君分題用業字

韻

寺本梁瓦棺地臨吳建業何人構虛亭勝槩壓危堞巖
扃豁常開江練靜相協洪濤雖震騰迅流終妥帖遠窮
滄溟盡近與長淮接水色古今同潮聲朝暮憎中間數
洲渚來往拏桴楫搖深鳴根喧渡閣孤帆怯到此是安

瀾遊人無病涉滿檻霽光浮平林風勢獵黃昏煙引素
清曉波成褶歸雲閒自飛列岫平如帖秋岸狎鷗鳥春
城噪批頰園橘冬垂丹隄榆夏飛莢竹徑粉筠隆松梢
飴露浥老檜倚軒簷幹勁如雄俠野花鬪黃紫格頑若
婢妾離觴歌柳枝江人憶桃葉往事杳難尋欲問言成
喋惟惜建邦都形勝敵岷鄴後人奉竺乾剏寺據山脅
邑居正佳麗棟宇爭煒燁山遊鶯鶯羽池變炎灰却鳳
去臺遂空國移人亦惛興衰既代謝榮悴固相躡幸今

明世逢早蒙湛恩浹安堵四民居飽食千僧饁吾儕正
閒暇來遊失疲繭心朋况邀從雲梯屢登躡山川思慮
清風雲抱懷愜百里見毫釐萬象入眉睫南望牛首峯
雙闕儼重疊却視虎踞基石城猶岌業北阜盤虬螭三
山樹矛鋏風流非昔時事跡看載牒開尊忘醉醒縱論
鄙嚅囁念當時值泰豈嘆徑未捷經綸苟韜藏鼎飪終
調燮攬景且留連無為利名攝

詠丘秘校山水枕屏

遠山近山各奇狀流水止水皆清曠煙雲到處固難忘
筆墨傳之尤可尚古人銘枕戒思邪高士看屏助幽況
左有琴書右酒尊怠偃勤興時一望

和林成之五題

客來

有客過我門開顏喜相見貧居何以待案上書千卷高
論到古人終日自忘勸非同豪富家絲竹留飲讌

城南

心樂郊原景人應似我稀城南時一到山寺幾忘歸新
竹當行徑飛雲戀客衣誰能咏招隱向此息塵機

江上

何處偏傷江上春天涯失意未歸人片雲極望添鄉思
孤棹隨波寄客身塞鴈來時憑遠信海鷗馴處見吾真
休嗟進取無成去幸有榮名足慰親

西隣

西隣擊鼓北隣聽飲馬持戈密相應一朝奮躍事爭鋒

朔氣充盈誇戰勝中原太平日已久及頓兵閒空細柳
二疆歛附歲奔馳捆載金繒萃淵藪飫肥服煖四十年
但欲包藏忘德厚謀夫憤憤壯士憂屢獻忠言曾苦口
廟堂尚論正無為肯向平時議攻守朔方三十有六郡
戶歛家輸佐行陣非無碩畫破妖巢直遣萬里威稜振
皇天愛人猶赤子縱欲毆之言亦訥彼方束手聽誓盟
重獲歲時贄琛賫斯民懷德樂休兵戍卒歸來解鋒刃
皆言隣徼復清夷嗟哉異類終難信

惜別吟

丈夫豈無淚不學兒女悲今日獨潛然為別良交知交
知不易遇一別會何時念茲出門去空有長相思非無
樽中酒亦有桐與絲未飲先歎惋欲歌還噤噫誰能諒
予心惜哉此別離

蘇魏公文集卷二

欽定四庫全書

蘇魏公文集卷三

宋 蘇頌 撰

古詩

題畫草蟲扇子

螺飛蠕動誠微物尺素輕盈誰畫出一朝君手將動搖
猶似吟風欲跳逸竹梢草際弄輕翰水墨淺深見纖質
昔人徒愛明月詩何似今看老師筆

清暉茅亭

山僧構亭山之麓旋結茅蓬架園竹千年巖樹怪枝虬
十畝龍池春水綠閒移賓榻向松軒一坐清風香馥郁
誰為漱石枕流人老此優游避喧俗

逢錢塘詩僧

把手忽相逢開談究詩義子雖浮屠流乃抱風騷志錢
塘佳山水一一助清思何處最堪懷飛來峯下寺

聞鼃

鼃龜何所恃喧喧矜善鳴不知穢污質羣沸沼池清游
子得無淚羈人若為情華堂有絲竹皆厭爾虛聲

和林丘二君會程坦之家二詩

春晚寒不已節候差李孟木行怯初陽水官恣餘橫滂
沱連月雨愁歎斯民病已忤四時和更傷羣物性園花
半零落猶逞晨粧靚隴麥將痿摧况值風威勁我願天
地心慎舉陰陽柄十雨應太平時豐順睿聖庶令疵沴
消永保寒暑正無復三月中慘慘行冬令

天涯人未歸飄然江海上客心蓬任風歸路萍隨浪青
雲少知己白日多罹謗著書見窮愁倚門知骭髀皇皇
干名祿戚戚足羞讓豈特為身謀所懷慰親望昔人在
困躋寧復論得喪吾徒抱道義豈不保趣嚮勉希一簞
賢無慕千乘相卷舒各有時出處當自諒

奉陪府公賽雪橋公廟紀事兼呈倅幕諸君

北走出都門寒垌冒初雪言瞻漢三公嚴祠奉遺烈檐
帷未行春首茲薦腥血念昨冬愆陽時風少凝冽長人

惜燭苗坐閣苦憂懃遣吏造靈宇精心致蕭炳冥感不
踰旬同雲寢融結旬畿千里間滋液徧農暇兆為豐年
祥倉箱行可閱報祈禮則然况乃人望缺前期告祝史
按令肆儀絕俎豆載博肥尊疊涕芳餽朱轡朝啓行騎
從紛交列雍容幕府盛陪預愧蒙拙聯行趨闕宮就位
修罄折拜望已告虔歎詠想奇節惟昔漢之季奸雄逞
權譎公初任州郡超然脫羈紲敢犯跋扈鋒終正狡吏
讞霽威遁世賢先覺安民傑舉當仇無避義在親則滅

入朝掌武事出塞受師子烽塵息邊土蠻貊竄巢穴屢
進行惟危保終名不缺世閱著廟鼎庸勲刊冢碣清風
邈千載血祀豈嘗絕時其福善事鄉人每談說水旱或
崇雩響應甚昭晰神實依于人禱祀戒輕媒今茲罄誠
禮庶可消眚孽府公臺閣老家聲繼臯契都圻出居留
條令見施設比民慈惠師事神染盛潔威行肅羣豪政
成除一切貳車實邦英諸僚亦時哲儒雅資緣飾吏治
賴關決非才荷寬矜幸免事卑屑方欣盍簪得載詠嚶

鳴關期會間亦希宴遊時豈輟嘉此歲事和樂哉民共
悅覽古極優游言歸日將昃

送趙君權中歸福唐兼呈陳季中

趙子抱經術儒林挺孤秀策足入上庠高誼諸生右秋
闈再程文懷寶不見售京師首善地翹然俊賢囿朝廷
舉新詔多士四方走主司搜擇艱有如羿張彀小善或
不遺寧當舍良茂豈非繩準高刀尺下難就得喪不在
已自信非我疚歲窮感親心倚門方遠候都亭謝知已

飄飄拂歸袖樂彼閩中幽里中賢友舊且復從其游行
義益充厚道存貴有用獨善古所陋明時無滯才子行
當勉懋

送許當世職方通判泉州

仕宦遠故鄉古人之所譏懷祿去養親千鍾且為微當
世倅州行二美其庶幾符竹非不貴誠與雅志違獨駕
簞簞車東南去如飛所懷戀晨昏奚論官等威遙遙七
閩山喬木正芳菲駟馬過舊遊道路增光輝榮觀慰親

心佩綬紆銀紉上堂拜慶日喜氣生庭闈躬扶版輿去
徑入牙城扉潭潭公府盛華顯猶布韋膳羞盈其前酒
紅魚鱗肥人生苟適意富貴安所希況今邦伯賢早辭
尹王畿亦從北堂養再擁雙輪歸君欣舊知己復得相
親依守相同鄉州會遇時所稀純孝自感人遠近聞風
徽豈徒對交親誇詫畫錦衣

和胡俛學士游西池書事

皇都有滄池近在金商陌淵源控河汴襟帶引京索衆

派瀉寒光一鑑涵空碧晴明天垂幕陰靄地滋脈煙嵐
隘五湖氣象吞七澤漪漣十餘里縞練千萬尺樓殿起
參差門闥開岑客人間識方壺古來慚太液美哉臺沼
名壯我帝王宅惟昔經始謀茲見神武迹非同泗淵濫
盖用昆夷策萬乘紆警蹕羣官扈鑾輶津頭駐翠華唐
中蒐赤籍水犀陳百旅畫鷁棹千隻時多呂梁人士有
中黃伯旋淵齊出沒桅檣競跳躑鼓柁變魚麗飛江生
羽翮一時軍事嚴四表皇威赫承平垂百年聲教重九

譯朝惟講文物民亦厭金革樓戈無復用池籞因不易
年年春風暮處處禊筵闌曲堤柳交陰上苑花遍拆舟
師校艨衝樂佾鏘金石翔禽鼓輕翰潛鱗躍修額鳴鼉
促繁節陰獸盪精鬼浮吹時往來綵標縱爭獲魚龍隨
變態波浪相激射何妨試趨勇豈徒觀戲劇吾皇茲豫
順庶物遂闡懌靈囿無禁止都人任遊適輪蹄去若狂
錦繡委如積臨流錯杯盤列肆張幄帟金繒樂揮散采
翠亂狼藉嘉會此難逢良辰真可惜前日瀛洲仙顧謂

同舍客言此好時節豈當虛廢擲掩卷下直廬連鑣出
東掖郊原朋盍簪舸舫觴浮醪指顧集珍羞餽飮瞻有
核暫喜解朝纓仍便平岸紗幘清波入平望嘉果富新
摘園竒插山丹水美鱸霜鯽誼呼少停樽眺覽閒信屐
畫橋躡虹蜺寶殿覘楹碣再見瓊林芳重思曲江席寵
恩徒欲報顓愚豈任責翩翩衆翹彥一一富才畫同時
致榮階云誰量遠蹠曰予孤陋姿本惟一逢掖無能拾
青紫有志厲冰蘖久事州縣勞已甘簿書役公卿廣收

揚文字誤拚撫得懷儒館鉛始識君門戟何乃英俊流
不才地隔同登石渠閣共閱金匱冊飽食任嬉遊縣
君奚補益所賴友賢能庶幾逭謫茲遊誠可樂何幸
謬見擇速賦醉言歸都忘日之夕風雲一流散俛仰成
宿昔集賢冰廳郎雕章古風格感此意稠重足成言四
百記彼集間事有如丹在白初惟侈榮觀終乃發幽蹟
分明指行藏礪硯見肝鬲諸賢繼佳篇仲吕和無射辭
源可渺瀰筆鋒俱書驕彼美雙南金輝映連城壁樂事

子同賦聯編予有獲欽慕風雅情慰誨詩書癖滯思豁
以開遙襟聳然釋報投愧芻蕘叩虛漫紬繹多謝久要
言贈君歲寒栢

和胡俛學士紅絲桃

京都花品予嘗評夭桃僅有十數名含絲繁艷今始識
鮮苞長蘂影紅纓春晴日暖助顏色灼灼一片朝霞輕
絞綃剪碎旋裝綴虬須摘盡將紉縈因知化工巧難狀
偏于草木呈瑞精又疑華燈九光爛蜂蝶不敢來窺爭

江南萱草易滋殖維揚芍藥初種成此花皆有紅絲號
恨不同時相合并君家數株發庭際愛玩常掛簾鉤瓊
有客風流欲寄目主人喜笑張筵迎飛觴灑翰偏得意
都緣尤物牽風情我雖多病不能飲猶思強舉花前觥
即席分韻送李才元學士守臨邛

君登石渠閣荏苒十過春編摩業既卒出入命已頻人
情歎滯滯雅意猶逡巡襟懷恬而曠鬢髮驚如新躬隨
省中籍念切堂上親前時動鄉思歸夢趨梁岷乞符去

故里拜疏伏紫宸恩頒尺一詔寵駕雙朱輪朝為浮瀛
侶暮作臨邛賓誰言蜀道遠自喜家山隣歲晏風慘慘
行役心欣欣怡悵同舍友仳離照心人杯行莫辭滿分
攜只明晨

和諸君觀畫鬼拔河

關中古有拔河戲傳聞始盛隋唐世長絙百尺人兩朋
遞以勇力相牽制芳華樂府務誇大黎園公卿謾輕肆
拔山扛鼎烏足矜引繩排根非勝事當時好尚人競習

鬼物何為亦能是展吳畫格入神品陸法尤長寫靈異
蒲津古寺筆跡奇世疑二子之紕置旗門雙立衆鬼環
大石當中坐渠帥蓬頭園目牙奮踴植鼓揚桴各凌厲
東西挽引力若停賦彩自分傾奪勢畫來已歷數百年
墻壁巋然今不廢觀風使者集賢翁每遊其下幾忘味
因令搦手裂齊紈橫卷傳看得形似精神氣韻信瓌詭
毫髮輕濃皆髣髴持來都下示朋僚一見飄然動詩思
諸公詩豪固難敵形容物象尤精緻氣完語健雋衆口

二子聲名轉增貴予觀昔之善畫者心手規撫無不至
窮奇極怪千萬端特出一時之用意鬼神冥漠不可詰
豈有便能人勇智仙官佛像亦如斯變態隨時轉奇麗
遂令來者信有說塔廟從而增侈費後賢雖欲究端倪
竟亦無由革頽弊因知怪誕一崇長漸靡成風滋巧偽
茲圖他日遂流傳更使人心惑魑魅

補和王深甫潁川西湖四篇

甘棠湖

為湖始何人人賢物亦久所以甘棠名百年猶不朽

宜遠橋

溪流去無窮路遠更難盡信步到橋邊望中千里近

竹間亭

青青林間竹有亭才袤丈林深隔囂塵人間見真尚

明月舫

明月照寒宵湖水白如畫縱覽泊中流清光應可就

刁景純學士寄示嘉篇述前後過潁遊覽之樂不

鄙虛陋曲蒙推獎感歎不足輒用本韻通成五
十仰答來貺

昔歲寓文館雅志慕藩屏嘗聞近畿州勝絕惟南潁十
年走京華官局苦閒冷欲求一麾去數奏囊章請適會
擇茲守乘時竊僥倖君相寵儒林念久貸讐責旋蒙左
符賜上戴天恩併扁舟促行役洪渠逐奔猛飄然離塵
囂有若出機穽從容光景多歷覽江山迴去都時值秋
到官月逢病此邦信名區民愿俗無警昔守皆巨公今

猶蒙鎮靖非才偶承乏繼治實多幸前賢有規模遇事
見要領因此頗閒暇得以探物景溪湖遶郡郭臺榭跨
岡嶺春媚花百名秋香倚十頃野色連莽蒼水容迷淥
淨虹駕遠路長鷁泛源流永幽尋窮勝處登陟疲足脛
適意自留連對人成詫逞是時汗流阻北客多過境景
純罷山陰前旆亦南騁予逢丈人行再拜肅襟衿君待
同舍生抗禮均儕等公齊薦具薄主席奉陪鼎饋以清
淮魚報我龍山茗西園復追從繼日承音謦胃懷坦而

夷不事畦與町杯盤命鑄簡絲竹煩正訂橫管教吹羌
新聲賞歌郢善謔劇笑諧盡歡忘醉醒自茲別經秋多
故值憂梗七月會同軌遠臣傷弔影交舊少經塗酒希
但虛四兀然坐空閣何異蛙在井故人勤眷盼尺書詢
動靜新詩三百言斷句露鋒穎念舊起悲傷曾遊皆記
省眷予忝疇曩被愛踰踵頂感慨知己心中藏聊自儆
景純書閣老二紀酬申丙當年文雅譽久合登西省心
貪為郡樂旌旌屢操秉徊翔成淹留前輩今誰並復聞

乞淮藩早已飾歸艇南河如可棹北渡時引頸溪亭待
清掃賓具重消整還當揖前塵晤語慰懸耿

省中早出與同僚過譚文思西軒詠太湖石

洞庭山連震澤水怪石巉巖出波底誰言行遠莫致之
好事經營俄至此愛君小軒才袤丈滿地新芳雜紅紫
偶來憑檻見奇峯便有江湖秋思起

送朱郎中壽昌通判河中府

邶詩詠凱風以成孝子志鄭人復君母傳稱能錫類中

郎常有懷生不識所恃登朝雖厚祿當食每忘饋念昔
鞠育勞嗟今出處異倚門豈不待兩求終莫致乳烏思
反哺哀鳴自垂翅百草搖春暉寧無謝生意灑血向穹
壤解組出臺寺馳驅咸雍郊歷訪經行地至行感神明
精神通夢寐悠悠大道傍親息忽相值紫綬拜北堂白
頭歸長嗣悲忻叙契闊恍如隔生事四紀世路殊一朝
板輿侍茲事昔未有聞者共驚喟帥守為之言詔趣還
官次當年二千石寵名非所利仕或便鄉關安用竹符

使蒲中母家近自屈為倅貳受命慰慈顏騰裝愜歸思
既徇報德心亦安效官智觴以萬壽薦衣成五綵戲無
復興寒泉何須賦大隧令人及聖善孝慈兩不匱贈言
述高風庶用激忠義

寄題徐郎中鄱陽高居望雲臺

予年在江海心存魏闕下君居雖遠方不忘朝廷者築
室負郊郭虛堂連廣廈浮梁江湖間風物最蕭灑官罷
得優閒一到休車馬開軒命賓客棊壺雜觴竿園亭助

登覽山川入騷雅霄漢不可跂惓惓誰能捨目睇西北
雲丹成此傾瀉出還擁旌旗歸復傲林野真得更隱趣
豈累榮名假宦遊羈紲中適意如君寡

秀才石君予同年子也攜書見投重之以歌詩意
甚勤厚其歸也邀予言為贈因作五言以勉之
石生故人子袖書遠相過趨翔有父風步闊冠峩峩自
言少也孤奉親由江鄱區區營甘旨靡暇謀其他三十
未有成無門托絲蘿求知走四方慷慨成悲歌顧我舊

朝來謂能激餘波多慙僻郡守局趣如生何空持贈我
句坐閣長吟哦方今紹唐虞詠歌繼卷阿舉世用經術
革去辭章訛詔書起遺逸草澤咸搜羅高爵待俊傑世
礪鈍以磨君子務藏器生其勤切磋乘時挾才策繼世
收賢科壯懷無自忽流年易蹉跎

石縫泉清輕而甘滑傳聞有年矣前此數欲疎引
入州治久不克就予至則命工人尋舊迹相地
架竹旬月而水懸聽事又析一支以給中堂一

支以入西閭其下流則醜出外廡往來取汲人
以為利因抒長篇以紀其功云

峩峩鳳凰山有泉出其腋初微才濫觴漸大乃穿石靈
苗蔭茶櫝寶氣近金錫毖彼淵源長茲惟雲霧液人傳
煮茗竒味與中泠敵陸生不到此云誰能賞識牙城據
岡巒舊井皆涵瀉先時屬經營曾未致點滴及此川谷
盈空為畎澮積我昨尋勝遊偶見為心惻料工度山原
舉步過門戟水道茲可行面勢正相直剪裁竹千竿接

聯筧萬尺派別起中阿架空踰下稷不及決旬間已到
堂皇側吐溜始涓涓循除俄瀾瀾盈科殊未止過潁非
用激公堂及燕寢股引各疎脈何期南澗流近在使君
宅日用助烹饗歲儲供醴醕冬春雖暫竭秋夏多餘瀝
一支出橫廊通衢見勿幕衆器競挹斟萬口得盥滌無
愧抱甕人幸寬挈壺役嘗聞武林都素號蓬瀛國非才
叨長臨惕日苦誼劇湖山空在望車馬難屢歷阻聽潺
湲聲謾憐蒼翠色自得飛泉來頓覺煩襟釋常時兩衙

退暫憩一軒息環流隨啓處玉音聞几席塵土汨以消
形容清可覲誰知簿領中有此山林適若非仕江鄉何
由見奇跡智者必樂水君子以觀德豈徒狎而玩寧嗟
潔不食良嘉上善功所至為利澤茲泉雖未大其用已
為益猶有膏潤資更期醞藻力來哲倘不遺庶幾成遠
績

蘇魏公文集卷三

欽定四庫全書

蘇魏公文集卷四

宋 蘇頌 撰

古詩

次韻蔣穎叔金部遊介亭望湖山二十四韻

我昨來餘杭孟陬值杓建春色正融怡皇華紆睠眄言
此佳山水巧麗極怪變有如畫屏風羅列圍四面城南
古浮圖又為一郡冠聯驅松徑中信步蒼崖畔莓苔粘

履屐虬枝拂簪弁縱覽識高深顧慕增詫嘆心迷真賞
奇意覺旅遊倦物色雖難窮指注亦粗遍樓臺鬱相望
無異挂盤線向非適幽遐何由盡聞見惟昔吳越君塔
廟務華煥依山鑄大像疊石累高岸經構無已時貲費
豈復筭較其輿地中佛寺占過半榮華一朝盡金石空
殘片歟識刻猶存排衙行不亂虛亭復增修郡府餘壯
觀故人栢臺彥早歲歷監殿自從交臂來幾回傷聚散
聲光日以高使節復頻換江湖偶追陪旬浹停車傳更

有山林期茲焉適予願

次韻蘇子瞻學士臘日遊西湖

臘日不飲獨遊湖如此清尚他人無唱酬佳句如連珠
况復同好相應呼君嘗聽事嗟罪孥雖在樂國猶寡娛
是社稷臣魯顓臾直道自任心不紆最愛靈山之僧廬
彼二惠者清名孤案上梵夾床龍鬚爐銷都梁饌伊蒲
潔行自欲敦薄夫長吟擁褐忘昕晡坐客不設氍毹
對鏡如看方輿圖君懷經濟才有餘名聲妖孽懲顏蘧

且來山林尋遁逋更玩四營兼參摹

陳和叔內翰得莊生觀魚圖於濠梁出以相示且

邀作詩以紀其事

公堂四合臨中衢翰林壁挂觀魚圖傳之近自濠梁客
云是蒙邑先生居先生昔仕楚園吏傲世不斬卿大夫
逍遙淮上任造適高岸偶見羣鯈魚清波出遊正容與
潭底傳沫煦以濡悠然餌綸不可及誰知此樂真天娛
惠施好辯發闕論謂彼固異若與吾至人冥觀盡物理

豈以形質論精粗稟生大塊厥類衆合則一理散萬殊
淵潛陸走各自適天機內發寧拘拘鳶飛戾天獸易藪
騰蛇游霧龜曳塗味色誰能辨帶鹿足頸烏用嗟蛇鳧
蜃筌信美害愛馬鐘鼓雖樂愁鷄鵠青寧久竹代生變
蝨蟲風化相鳴呼方游溟海大空外坎井詎能談尾閭
若知飛息分皆足圖南未必勝搶榆人生均是受形氣
好惡歡養同一區死生壽夭亦大矣自本而視奚有無
方當在夢則栩栩及其既覺還蘧蘧入榮軒冕不累性

獨往丘壑非為愚不求刻意不徇利孰是隱几孰據梧
惟能應變不囿物天籟自與人心俱一從郢匠喪其質
狂言空見傳于書當時陳迹復何在客有過者猶踟躕
先當朝士題咏處不見綦履空遺墟畫工智巧良可尚
景物縱異能傳模古今變態盡彷彿旦暮烟雲隨卷舒
遂令都邑繁會地坐見淮山千里餘泛觀既已忘物我
企想豈直思玄虛惟公雅尚每耽玩持示同好良勤劬
自憐衰老喜求舊况荷明照均友于朝陪玉堂暫晤語

暮入華門還宴如欣然共樂濠上趣相忘正在江湖

次韻將穎叔同遊南屏見惠長篇

青山橫莽蒼萬石出南麓古剎表耆闍高聲聳羣玉居
惟擇岡巒近靡數松竹郡郭路非遙遊人春不宿陟嶽
極躋攀循崖勞偃伏架筒引流泉跨嶺構重屋講座據
妙峯禪堂對枯木幽尋難屢期將往誰能獨偶逢霜臺
客暫駐驄馬足聯步訪叢林終朝走郊牧相期方外遊
頓忘河上曲夷路喜君騰高閣慙予東更聽名理言俯

愜中心欲況已證真常詎止齊寵辱願言挹清風可用
警浮俗

次韻蔣穎叔同遊超化院

賢良才識明御史風望清命駕千里至

穎叔自毗陵持來杭

高談

一座驚舊故偶獲道離憂自茲平竭來湖上寺共語堂

西楹念昔一交臂幾年兩搖旌契闊信靡定邂逅欣偕

行日薄聊頓轡興來再飛觥霜林隕丹葉泉坻結新冰

湖月金炯炯竹風玉玲玲峯巒對三山樓殿如九成南

州足奇麗此地尤兼并因君發題詠足使增嘉聲

次韻三弟學士題七寶英師壁

巖居得幽勝俗累無憂傷占彼鳳山腋建茲法雲堂宵
眠一氈蒲晝食幾稻粱淨衆集善緣勇猛能自強瑞相
巖中楹梵夾羅四旁軒窗據蒼崖松竹圍重岡不雜人
世喧更覺禪味長我嘗命賓友間或攜肴觴中休憩丈
室遠覽登上方念昔保城塹屹然壯金湯列刹以百數
息民殄千殃爰居盡樂土利用無缺折遂使吳會俗長

為禮義鄉何獨竺乾域寶山亦清涼

與蒙城知縣陳著作同賦吐綬鳥

羽毛之美其類衆雉曰吐綬世尤重靈姿異稟來何方
有客攜持自咸雍朱籠馴習繡整調珍貴不與常禽共
庭前愛玩不能已欲買未有千金俸一座嘉賓共詫誇
留連為倒春醪爰送將題目與詩人要待清才如屈宋
斑斑赤質鬬花紋璨璨明珠絡衣縫暖風晴日正閒暇
綺翼丹趺時鬟鬆垂胡兩組錦舒張約髮雙筭玉浮動

倏忽披開疊勝文蒙茸亂綰青絲綜初疑瑞草銜鶻啄
又訝鵷纓影馬鞍行滕赤芾交脛足羽服袿衣曳蜺蜂
漢官綬綬何須染鄭公書帶徒勞種引頸纔盈尺寸間
鏤彩盤條無缺空未容俯近復卷收頃刻無由發清嘒
向人顧盼雖無言奮臆猶如將告控有生之樂貴得所
所樂山林殊市闕斥鷃飛翔本蓬蒿鷓鴣社稷存梁棟
不慕爰居享鐘鼓要逐鳬鷺啞菰葑臨流照影刷羽翰
朝飛求偶隨羣從十步一啄百步飲烏用樊中久羈梏

主人提挈誠厚恩豈若郊原使閒縱我聞章服以旌禮
物有等威須折衷鞶囊厲帶最光華寵錫或招三褫訟
惟茲異類亦何知被服文章安所用得非造化育羣倫
美惡短長皆適中凡物有用固為災矯性傷生尤可痛
介特一死古士摯得時三嗅子路共晉室文裘或遭焚
羽山夏翟先修貢解顏亦取如皋獲離寧已入王詩諷
旌旄甚盛見楚人樂綴有數聞衆仲嗟嗟才用既若斯
竄伏何由脫羅網今雖窘束苦籠檻猶勝烹燂充調供

徘徊且逐稻梁肥莫厭庭除資好弄方今太平物遂性
異獸奇禽罷供奉庶民咸樂萃靈臺上苑虛開發雲夢
西雝既已翔振鷺阿閣終當集靈鳳佇見觚稜神爵棲
重歌蜀使碧雞頌惟爾文華固異常效祥薦祉宜飛詠
近郊數牧好遊遨應須一借扶搖送

次韻陳蒙城金風堂射飲

南都綠蟻封初拆西圃芳條換新碧賓僚相遇惜餘春
樽俎留連因促席百夫決拾看和客何用娛賓循飲格

前者新詩嚴武事幾日毬場較鋒鏑幕中賴有從事賢
抱器逢時隼當射聊從把酒發笑談豈獨鳴弦觀準的
分明爭計算多少舉令都忘歌節拍蒙邑大夫富才藝
早擅詞林名藉藉昨來州序偶淹留幸接話言踰宿昔
行籌不必苦辭觴得雋况曾先射澤多慙病守鮮歡悰
出口無奇但喑啞貪榮竊祿未能歸每聽春禽愁杜鵑
今朝何似強開顏為喜尊前有嘉客

和蔣穎叔亳州矮檜

檜生本修直此種特殊異高不盈尋丈廣乃遍堦砌短
幹自堅強附枝交蔭翳森然葆羽歆隱若虬龍墜不知
何代有木老色彌翠嘗聞古仙者應化在茲地手植有
遺跡深根幾千歲神靈應護持道宮存歎識自此物色
繁因為圃人利封殖雖地宜屈蟠由巧智以彼凌雲姿
還同蔽牛類拳曲如能壽輪囷不為器誰云矯生質終
亦遺世累詩伯一留題禪叢重增貴豈若榴櫟然空傳
草木記

暇日遊逍遙臺觀南華塑像獨置一榻旁無侍衛
前無香火對之歆然起懷古之思因抒長句一
千四百字題於臺上

憶昔初讀南華篇但愛闕辨如川源沈酣漸得見真理
馳騫造化遊胚渾潛心四紀不知勸閒日講解時尋溫
其言無端極放肆大抵順物尤連犴芳煩反六經高深如

韞櫝百氏蔽偏迷躋閣伯陽語道最淵邃中士尚或疑
亡存竺乾權實信廣大妙用不出我藩垣偉茲三篇粹

精奧推本一化開幽昏反覆孝慈去願譽胎育仁義除
詐諛情類相親自才德蹊跂不立存樸惇寓言本為大
方設弔音的詭難與常人論祖尚玄虛滅理學乖背宗旨
由後昆遂矜放曠為任達由此道真流亡反平聲自非通
識造閼遠安能超悟還淳元大鈞幹旋本何有相禪以
種紛無垠載其形聲直嗜醺感彼氣類相嬪媛死生之
辨在旦夜夢覺之異分形鬼神竒臭腐牙美惡蜩甲蛇
蛻奚代迤卵胎無以易生種風化自爾成蟲蛄出入于

機泯無際始卒若環焉可捫芒乎萬致始同體明以一
指彌滋繁異則肝膽為楚越同則蕭竹猶枿圈真宰難
以朕迹見靈臺莫由形器援何者非彼何者是孰為親

愛孰為怨

平

六鑿相攘有利害兩溢類妄成鬪諠至細

不必陋蠻觸倪大惡用驚鵬鯤天機所動體各適足行

豈異唾者噴外物既重內固拙瓦注則巧金乃殫物之

儻來莫禦止心所希跂俄屯腎

音

有疾無用亢豚免其

迹已陳芻狗燔全生難恃社之櫟移是不定臘者脍

音

逢真令尹龜栩栩恍醜全人脰肩肩

胡恩反

因知禍福相

倚伏故于得失無墮螭

上音陳下音惇

惟能膽闕以生白是乃

孰耨而厭殮道非處服無不在人以德性為之原有情

有信非可致一滿一虛常不騰九年大妙得之野參寥

疑始傳諸孫稀韋以之挈天地堪坯以之襲崑崙明此

南鄉唐堯帝明此處下素王尊衆人逐物但役役一曲

自守常暖暖

音暄

修躬明汚躬則殆飾智矜愚智彌昏單

豹治裏外逢害張毅修襮中成殍退不為賓賴陽樂盪

而傷性寡水跋

音存

二子高節去孤竹三閭獨清浮湘沅

棄世終亦餒薇蕨行吟徒自悲蘭蓀彼為禮義矯末俗

猶以佩玉趨橐鞬將明是非崇世論何異狐白資紕絆

禮義治則忠信薄是非著則名實翻尚賢貴德下滋偽

信賞明罰民尤冤宋榮猶然在譏世其于毀譽方汶汶

門音列子待風乃輕舉豈若御辯常掀掀至人達觀齊物

我直往上古惟愚

音屯

內通耳目外心智旁挾日月超

乾坤安時處順任天倪

音諳

抱德煬和遺世喧悅乎忘言

喙鳴合窅爾自靜鯢桓潘

音潘

養生之主悟文惠治氣其

勇過孟賁形形不形睨初始物物不物隣羲軒得計棄

智任魚蟻勞形怵心嗟虎猿呼我牛馬誰毀譽夢為魚

鳥還潛翮其窮不屑涸轍鮒其高乃況南方鵠方其息

死樂枯髑亦既恬生慕孤豚嘗聞藏言乃笑杖既見偃

室聊歌盆畏龍不羨宋人乘覩鵲自感雕陵樊廣莫將

植擁腫木江湖可浮瓠落樽不將不迎隨物化一龍一

蛇更蟄蛻以道泛觀未切著得時而行或曲卷皇王上

下惟變適周魯舟車殊運奔顧指不為天下化排進靡

使人心債

音奔

人于應問見影響物被生殺通淒煖音喧賞

罰九變得其序澤流萬世非吾恩相鑿乃合儒與墨小

辨豈數衍與髡河伯不逢海若語豈知至道無窮門雲

將未得鴻蒙問烏覩生物復其根神而化之不蘊立未

之盡者能誨音噶

音悞

長波所盪滿今古異代相應猶麓塤

喟予所稟實樛散作器自愧非璵璠逢辰偶得仕通籍

微倖當與游西崑材力未足勝蝨股取舍徒思擇熊蹯

行年六十粗知化藏經十二無能繙平時有志在寥廓
遇事無意從緡昏櫻而後寧直歲月老之將至忘寒暄
盱盱未免囿於物擾擾不異風中幡昨從京輦絳丹筆
復得淮壤乘朱輜偶逢樂歲少休息歷覽士俗因周爰
提封乃是昔仁里訪古時復登平遠城中蝶巷接蓬頭
郊外魚臺連漆園悠然清風隔千載獨有遺像當高墻
山川世異改城郭歲時人罕羞蘋蘩先生縣解出無有
後世景仰空擎拳大布縻履生弗飾豈蘄朽壤衣如璫

烏鳶螻蟻死不避安用丘墟祀有膳虛堂雖異生存處
操趣猶令貪薄敦我懷方外想音采坐視券內毆冥煩
曳塗竊企濮水釣投轄更思東海蹲子葵雖未得其道
意而固願遊其藩聖人之書議者扁妙斲之質良在懣
漢書音義鄧空遺糟魄寧咀味縱有履跡焉投跟何當
作懣音溫
一發雞羴覆因而更焚駒項轅天光內照宇自泰人益
不累中無悶云誰嗣響可晤語至理竟亦歸無言

蘇魏公文集卷四

欽定四庫全書

集部

蘇魏公文集卷

八至

詳校官庶吉士臣朱理

檢討臣何思鈞覆勘

總校官進士臣朱

鈐

校對官編修臣盧

遂

謄錄監生臣施

華

欽定四庫全書

蘇魏公文集卷五

宋 蘇頌 撰

古詩

次韻司徒富公耆年會詩

古人稱宴安居處必擇地諸公來河南有若不期會巖
巖大司徒早辭槐鼎貴嘉謨納淵衷故事留臺寺構第
銅駝坊開門瀦水次居守德爵同位重官三事高軒每

過從縱言談道藝復有鄉里賢夙昔承嘉惠崧嶺高橫
空洛波清見底履道追昔遊行厨載芳醴燕毛禮所重
安車皆戾止年尊二國公齒序衆君子願公壽千秋慰
民瞻具爾三載一來朝當陪天子祀

次韻王宣徽太尉耆年會詩

古來賢相稱高奇虞有臯夔商傅伊帝臣王佐見謨訓
千載相望如同時我朝公輔代間出鍾秀辰象分躔離
堂堂太尉實異稟風質粹美和而威仁皇始擢自藩翰

渭水兆告非熊羆立朝早已擅風采料敵曾不失毫釐
聖聖相承倚時棟入登槐鼎出擁麾司徒相繼據魁軸
勢壓諸夏摧附枝一言寤意尊社稷萬里奔命來戎夷
君臣一體自同德下鄙漢相矜規隨功成治定預告老
還鄉治第當西圻十年休佚養冲氣泰宇充茂心欣嬉
二公勲德誦人口載于彛鼎歌于詩吾皇得相柄文武
調燮四序齊璇璣孟軻嘗稱聖之任乃曰百世人之師
固宜天畀兩元老期頤常保松筠姿規撫載在廟堂上

自使風俗淳澆漓前年召自大名尹對罷累請菟裘歸
帝曰公今更强固閔煩幾政留清規兩加金貂百官首
再剖玉麟三水涯洛人聞之喜且抃如在旱歲逢雲霓
朝臨留府暮私第偃息又將彌再期今春欲作者英會
涓日象值神俱比謂宜飲食與宴樂對接賓客心忘機
康寧壽富復好德嚮此巨福全者稀席間諸老盡賢傑
相得歡甚敬冠綏飲盈百榼似尼父歌有三樂同榮期
杯盤衍溢逮輿隸割肉醢酒如林池衣冠填咽兩城市

車馬照耀清漣漪
夜闌百炬列紅燭
天寒四座添重幃
鉅儒灑翰序嘉會
義薄皎日垂清暉
諸公半酣各賦詠
含毫疊紙魚鱗差
詩成累幅燦珠玉
光艷宜若陵鈎奎
歌聲旖旎嘯鸞鳳
酒氣冷冽噴醅醪
長篇立刻在金石
楷字高揭當軒墀
晉公延賓就綠野
謝傅卜宅臨清溪
當時貴客亦有數
詎與今日爭光輝
謐書遠報鄴都守
開緘摘句情融怡
答言遂起歸與興
跡雖未往心先飛
三賢事業固同道
用舍安得常情知
官尊邦國之柱石

望重士林之羽儀退舍進用自殊致大義當以公言推
不能則止固達識陳力可行當有為聖君知臣賢達節
事有輕重須從宜寧拘經禮致為政自有邦人歌袞衣
三台明潤少微爛光彩並照大紫微子房辟穀方壯歲
張蒼作相當厖眉曹參置酒坐公府晉賢高蹈來東籬
昔人出處固有意造適自與時推移光陰可惜且行樂
任從鸚鵡方春啼

次韻君實內翰同遊范景仁東園

鑾禁限沉深黿頭雄鼎屬主人出休沐秋色正明麗偶
為東園遊便有中林意縱言得造適覽物增意氣風清
濯煩襟日永忘歸轡朝野本無間簪組何用棄未必幽
棲人識茲真樂地

效范景仁侍郎次韻和君實端明長句奉呈龍舒

楊守

公居幽絕誰能紀欲到應須勞屐齒從官出入路縈紆
況今又去藩龍舒人在天南居在北鄉心千里雲山碧

山庭不用勒移文時樂中和歸未得他年若尋仙老會
洛下諸公盡中外百二十坊山水間甲第相望門巷對
過從不獨賞芳珍造適何妨談道真回頭却望朝市裏
多少思歸未去人

六月六日訪晁美叔吏部越宿蒙惠長篇因次其

韻

近伏值休幹端居無所為觸熱事造請有如襪襪詩偶
到昭德里主人不吾非惟今吏部郎望清秩非卑而與

兩銓選事聯相附離每聽人物論尤詳臺閣儀沿龍尋
本原左右逢津涯登朝鬢猶綠繼世衣仍緇歡然久相
接甚矣嗟吾衰誰言同趣舍何力能嘘吹但慚蒹葭陋
坐對瓊林枝時或把書卷不厭顏生飢間亦忘形骸任
譏訕宗癡喜君方得塗騫騰復何疑豈此哀烏省能留
威鳳姿君才適時用早聞天子知荷囊與鳴玉獻納無
不宜寧校歲月勞求為法令師

次韻蘇子瞻題李公麟畫馬圖

霜紈橫卷書緇垂軸以瑇瑁囊青絲披圖二妙駭人目
筆畫勁利如刀錐龍媒迴出丹青手勢若飛動將奔馳
羈銜如在赤墀立僕御猶縱紅纓羈子虔六轡銜沃若
長康駿骨稱天奇雖傳畫譜入神品未有墨客評黃雌
六詩形似到作者三馬意象能言之奇蹤莫辨霸或幹
高韻壓倒陸與皮從來神物不常有未遇真賞何人知
君不見開元廐馬四十萬作頌要須張帝師

元祐癸酉秋九月蒙恩補郡維揚十一月到治莅

事之始首閱題名前後帥守莫非一時豪傑固
所欽慕矣然於其間九公頗有寅緣感舊思賢
嗟嘆不足因作長韻題於齋壁以寄所懷耳

維揚禹九州淮南唐四鎮地據江海衝星占楚吳分五
季劇荒擾我朝夷僭閏督府時稱雄守帥選常遴由來
竹符使莫匪邦家聞其間九賢者尤推萬人俊太原文
章伯師友淵源濬五事陳便宜七制推典訓屢薦官雖
崇三已色無愠

王元之一登翰林三踐西掖屢被譴逐
皆以直道嘗作三黜賦其末云令尹無

愠予之所師下惠不耻予其庶幾先祖少舉
進士時嘗獲贄見公有池亭詩石今在西園
岐公老藩
朝惠愛浹吳晉荐士言有味偃兵功不陳鼎飪方燮和

丘園終委順

杜公自河東提刑移鎮于此尋遷淮南轉運使後登樞府議西師守用策未幾元昊

請命登庸纔半歲出藩遂還政居南都十年而薨其薦士于朝廷者最多而予被遇尤異淵哉文肅

公生邁休明運三朝翰墨工二府謀猷奮道卷任推遷

名全茂縉磷

盛公始以文學被知太宗召真館閣真宗仁宗朝再入翰苑遍歷二府兩黜皆由人

累再典茲郡卒以壽老致政考終先公銘誌其墓

鄭公梁棟才天質璆琳韻大

筆弟兄同萬事朝廷問徊翔極宰樞終始無疵吝

宋公自參

預出塵郡人安其寬簡去後作愛思堂以懷其德在郡賦詩有刻石僧寺予在館閣最蒙稱獎仁宗初

倦勤魏公復來覲堂堂真相尊謦謦嘉言進十字篆勲

勞大丞報忠蓋

韓公在郡日大葺府城自此方鎮事體始備郡人思慕立祠堂于雍熙浮屠迨

今尤盛其墓碑神宗御篆十字以表勲烈又配享英宗廟廷公在朝予屢獲款接

樂安予舊館

早歲窺墻仵儒林仰宗工政府發閱論雖無鼎銘勲却

有書傳信

予舉進士日歐陽公主文衡誤見賞拔後留守宋都予在幕府自爾相知尤厚始終不替

大明寺平山堂公所
作最為一郡之勝

吾友仲遵父利器發硎刃論經鄙

章句縱辨推凌誅

音訊

經緯夙志違風流壯年盡

予與侍讀劉公

少同硯席每愛其論經義談歷代高才博識謂當輔相
承平中年而殞士友痛惜今雲山閣有留題詩時會堂
唱和詩並刻于石 文武惟秀公將相紆雙印入輔復出藩撫淮

兼帥潤憶昔獲攀稽後來嘗慕陶

陳公倅符離日子為郡從事其後入朝屢

同官局嘗相期卜鄰丹陽後以潤帥兼相印鎮是郡

司空一代宗累葉清風振繼

父漢韋平致君古堯舜時嘆人云亡上嗟天不憖

呂公與予

少時相得于場屋及仕朝廷接跡最久後公薨二聖嗟悼曰國家不幸司馬相呂司空相繼云沒予亦嘗預聞

聖語有祠堂在興教院

昔人企前修景行仰高峻聲氣或相同古

遠視猶近馬遷稱晏嬰羊祜交陸遜異代思執鞭仇隣

通饋餽粵予望諸賢先後來茲郡既非鎮俗才仍抱終

天譽

先公嘗領是州辭不赴

砂礫自澄汰鉛錙殊銛鈍將書名在

石終慚駕附駿前人固難追遺德猶可徇鞭後志良勤
思齊言亦訥顏快章在懷年侵霜滿鬢俛仰復奚為茲
焉俟嘉遁

累年告老恩旨未俞詔領祠宮遂還鄉閭燕閒無
事追省平生因成感事述懷詩五言一百韻示
兒孫輩使知遭遇終始之意以代家訓故言多不文

我昔就學初韶童齒未龀嚴親念癡狂小藝誘愚鈍

戴大

禮曰八歲就外傳教小藝履小節

始時授章句次第教篇韻

我生五歲先公口授

孝經古今詩賦皆成誦又令從諸父教學不數年而誦五經習爾雅知聲律

蒙泉企層瀾覆

篲期九仞十齡獨侍行千里赴朝覲靡依心向吳能事

躬在浚應門待賓客睦族周分親

去聲

雖免逃杖讐猶虞

裕蠱吝

天聖中先公服楚國太夫人喪外除自維揚赴調適值外祖龍圖陳公出守餘杭以先妣魏國

太夫人久別欲邀同行時予十歲獨侍先公入都會盛文肅公在翰林薦先公文館法當投進所業使予管勾裝寫進卷及接待賓客相過諸公皆一時之望予獲侍側頗蒙獎顧時盛仲謨學士坐中試予以省題詩予即

時賦成尤
見賞激

十三從師友羣彥得親近

音附近之近

箕裘襲素

風蘭芷漸腴潤

先公宰無錫日即縣廳西圃開學舍延諸生郡進士華直溫新安閔從先輩數

人同結課予時十三歲與從叔宣甫山甫同硯席預課試後二年先公通判洪州又延鄉先生萬君特講書予與諸父及臨川蔡元道元翰昆弟皆同聽學時南城李觀泰伯贊文謁先公亦留館齋中得以切磋蒙益多矣

佔畢自忘勞攻堅常切問六經日沈酣百氏恣蹂躪禮

樂原夏商春秋道堯舜論詩識溫柔講易知謙巽書要

通上古史亦靳盡信復熟中庸篇推名善惡混楹書迨

今存手澤亦未泯賴此漸摩益稍知賢聖蘊

先公舉賢良暇日試

筆手寫中庸一篇付予令熟讀誦之可
以見性命之理其書至今秘藏篋笥
十八隨鄉書三

冬閱文陣同時韋帶倫共試棘闈濬少年事矜豪屬辭

少繩準程文竟乖疎貢籍果遺擯

予十八預府薦時主司吳正肅公頗以博

學識題見獎便許以遠到自此士大夫稍稍稱道明年春省試以犯聲病格不收時主文盛文肅公謂先公曰試文當在高等以點檢官指摘詩中押聲聞字退落誠可惜也內負未蹉跎不能忘起

債

既知以聲病黜落遂刻意音訓之學自爾頗知字書

賞延輒辭官雅志將自奮

康定元年乾元節推恩近著先公任中書舍人欲奏薦予乞且應舉先公初不憚既而大稱許復勉以勤篤又延建安黃晞先生數公置門下及與長樂王深甫子直清江劉原父貢父兄弟同硯席凡五六年後予已忝科

第往來京師
猶相從講論
筆苦手成
眠稀目生暈
常患涉獵疎肯

效揣摩困再上忝乙科初筵習磨楯綢繆結官課奄忽

罹憂疹靈光未及賦陟岵遽銜豐

後漢王文考父逸欲為靈光殿賦使文考

往魯中訪求事迹比還乃獻此賦父問其故對曰為文損思慮大人思苦今年高不宜復爾父遂不作先公常戒吾令習六科業未就而遭大禍每痛不及文考之獻賦星行赴幃堂雨泣護歸櫬

先疇閩嶺遙寓舍京口近

遠近

葬營帶郭田地得兼山

艮

予登科初補宿州觀察推官值先祖太尉薨背先公持服寓金陵朝廷特就移予知江寧縣才滿秩先公

在河陽下世予星行護喪南歸治命以泉山鄉里道遠不可歸令于昇常間卜葬謀居既過京口會故人錢起

居子高作守治館相留時有道人自真善山水學從子
行常潤數州擇得今青陽墳地起乳山艮來南走京峴
巽岡西北枝艮落即今先公墳術者皆言善
地遂安葬自此謀居郡中占丹陽為鄉里
送往極充

窮拊存急調賑三釜須自謀一官姑孟晉

見班固
幽通賦

恤孤

逢舊知溫故拾餘燼薦衡荷德璋嗣向憐子駿給札恩

特殊除職選尤遴遂去州縣勞入陪臺閣俊

予既除先
公喪祖母

徐國太夫人先妣魏國太夫人在堂及諸姑弟妹未婚
嫁家素無資不暇擇祿急趨銓調授南京留守推官食
貧累歲先友少師趙康靖公少傅孫文簡公洎諸翰林
連章薦文繼先世蒙取索先公遺橐及予投贄乞召試
職名先是言事者奏近歲文館太冗乞加慎選時預試
者如梅堯臣宋敏修宋充國楊忱并弟慥文詞皆入等

止遷秩或賜科名及陞差遣逮予被薦執政進呈云近臣薦父子文學優長仁宗問誰人予執政以先公名對上曰特與試乃試兩題俱書高等時翰林曾胡楊田四公皆云近預試者惟馮京蘇頌皆入高等因此遂得職此並梁丞相所喻云校文適三折食貧歲四閏君相嘉宿官圭符

假名郡地望號優閒公租稍充初二偏豐旨甘百口免

飢饉

予在館閣九年與同舍陳述古孫聖途俱請外補久之無報遂同見執政丞相富鄭公問九年不遷

未有前比莫且別移一京局予再三言食貧且久難更伺候翌日特為奏陳獨予得汝陰善郡陳孫歲淺得常

郢皆常調也

方喜私願諧遽叨召音迅素非幹時才屢試投

虛刃治績愧無聞官資謬超進持橐入記言演綸漫燥

叻事無補毫分心常懷憤懣一言偶寤意三已固無愠

予守穎將二年忽被召遷府界提點踰年徙三司度支判官又二年出為淮南轉運使神宗初登極因送邊使還陞對特蒙訪問北邊事頗合旨仍宣諭二府故到淮南才五月召還修起居注遷西掖掌誥二年因論差除御史事蒙中札召對詢問本朝故事上初甚以為然及有褒語無何執政以為違忤見黜歸班趨常朝者一年半遇恩出領東陽移譙郡還朝兩領三班銀臺又出南都知餘杭入為史官尹京府以孫純陳世儒事貶濠梁凡五換推及入對獄卒無一事結吏議乃罷濠領孟辭以先公薨逝之地改知滄州再違金門籍

七換竹使印賜環元豐初解組橫海鎮虜信使約修周

官預詳攬

居運切見前漢書刑法志

上號太宮辰奉冊陪發軔復土

裕陵日杖桐方守殯阻趨七月期莫從百夫殉才數月

上喻執政云要蘇某來修一書令速名歸遂有判吏部
修官制之命及進對上曰朝廷與契丹通好歲久故事
儀式舊章案牘遺散者多每使人來生事無以折證朕
欲裒集國朝以來至昨代州定地界文案等以類編次
為一朝典章使後來得以稽據朕思非卿不能成之又
宣諭云近日修書臣僚多遷延歲月只如密院機要已
七八年近方奏請差人檢閱已令罷之卿該通勤敏此
書何日可成對以案籍浩大幾數十架急急編次亦須
二年不知果可成就否上曰二年了得甚善有旨就樞
密院第四廳置局仍許辟官檢討指射密院人吏于是
曉夕比次逐時面奏商議立例類不踰期成書二百五
十卷奏藁日上大喜乃御筆賜名華戎魯衛信錄是年
南郊加上仁宗英宗徽號予預五使奉冊乘輅入朝明
年先帝升遐予適丁先太夫人憂寓維揚不得預挽紼

之列于
今痛恨

哀麻雖未除淚血猶未收誤被兩宮知首頒一

札訊入長天臺班復冠鰲坡峻

太夫人服除蒙詔書已除刑部尚書令乘驛赴

闕踰月改吏部二年除翰林承旨

拔擢登台司咨俞陪坐論屬時久承

平狡羌未誅震

誅震見陳湯傳

任重才難勝位高躬易隕丹衷

徒塞塞明誠乏斤斤靡憚嘖言煩姑守王臣蓋聖神眷

始終進退禮周盡禁殿陟青規琳宮叩虛牝再辭淮海

藩未許丘園遜

予自承旨拜左丞二年忝中揆又一年言者論臺雜牽復事云予獨主之予聞

言即時出省歸私第待罪同列見喻云且須翌日見上累叙陳然後求罷貴全進退之禮予答以宰相一有人

言乃是物議不允豈有解紛之禮連上三削一劄獲罷
拜大學士領集禧觀使恩禮優異近歲未有中謝日兩
宮褒語知卿無他意只是避人言其年出
守維揚再告老復有宮使之命許還丹陽風霜經六紀

蓬祿垂兩鬢躬閒猶冠帶祿厚足儲餽貢餘香龍團上

尊白羊醞歲時荷恩霑漿藿對饋責

予久參近著俸賜甚厚然族大家虛

贍給常苦不足故每飯不過一肉非賓客未嘗飲宴每蒙恩賚極知慚感

春園乘閒灌冬戶

隨時墮入對書甲乙出驅車薄笨扶杖拜先塋攜觴問

田畯蕃室勸掃除綦几聊憑隱

於靳反

養浩希子與學生

同祝腎念昔多艱勤誨爾宜悵憤見賢弓在檠遇事驂

從靳

見左傳

競情思昔非視舌知柔韌高門訓序畏

早聞先訓

以謂門地高華可畏而不可恃

予刻心遵守常以為戒後因讀柳氏訓序乃有此語欲使爾輩知之以代韋弦

刊腹摩甕慎

穀城國門有石人刊其腹曰摩甕甕慎勿言唐劉洎少嘗遇異人謂之曰君當佐太

平得富貴然宜慎甕甕之戒洎後為侍中以議論不常獲譴

名教樂有餘異端戒多

索其要本誠明烏在問圓頓美璞不雕琢安得懷瑜瑾

良器不深藏渠能免瑕學學問不沾洽何由垂望聞

去聲

見詩音

操守不堅純久必成緇磷進修欲及時行違要無

悶士行惜分陰伯陽嘆往運當年倘因循晚歲必悔恨

更思祖先勲相傳清白訓世胄閩與吳宗姻期及綬衣

冠布中外椽土無尺寸逮吾老鄉閭始得營畦畛蝸廬

庇風雨稷田助饔餼幸與仁智隣仍遠市城恩沈侯東

陽居陸叟頤山遯

陸希聲退居陽羨自稱頤山遯叟

出處雖殊途豐約

已過分

予初置京師西岡宅甚隘陋罷相日二府諸公見過以為不稱相第予答以曾高以來忝仕朝

廷下逮子孫輩已有官而四方無尺椽寸土今有此第已為過分比還潤又營此居處及近創少沙田追思先

世已為華與若非遭遇上恩何由至此但恨未有報國之地耳

考室俟構堂肥家在忍

順見柳氏

常使棣華榮無致荆枝忿中黃須自防外誘

不可徇懼爾志悠悠故吾言諄諄去聲力行儻不渝家聲
期遠振

蘇魏公文集卷五

欽定四庫全書

蘇魏公文集卷六

宋 蘇頌 撰

律詩

金陵府舍重建金山亭二首

地出城隅闢故臺
斬茅刪竹受良材
春塘夢草成詩後
畫棟飛雲式燕開
一境山形天際望
四時風物坐中來
府公經構民偕樂
魚鳥猶知喜躍迴

故時臺榭對池心空有名傳擬穴金鬚理茅茨修竹茂
經營軒檻綠楊深橋橫斷岸虹流彩花滿芳園鳥嘯音
盛府多歡頻命席每容疎外共窺臨

潤州錢祠部新建寶墨亭

王蕭書迹衛公詩流落江南世少知古寺購尋遺刻在
新亭龕置斷珉奇模傳遂比黃庭字埋沒非同石鼓碑
墨數書評多逸事何妨揮翰與題辭

和俞仲素太博遊茅山二首

宿明真觀

平林行盡到巖扃一昔恬然道味生
爽籟遠隨林谷響飛雲時拂棟梁輕
閒傾仙掌流瓊液高論神方鍊日精
更想真遊成不寐坐聽松韻到黎明

馬上初望茅峯

三士隱淪地上林句曲前謁來思訪道
屬望賦遊仙松引飛輪路雲收積玉巔
華陽不知遠趣駕似行天

次韻和丘秘校登長干寺塔

九劫半依山經營昔甚艱周遭嚴佛宇直上俯天關登
陟緣梯險淹留布坐慳椽楹亦塗附櫺檻遍朱殷白日
分明到青雲咫尺攀龍潭斜影落鳥翼怯飛還基構從
吳晉聲名動朔蠻燈然時照耀梵唱每循環往事稠重
問前朝指顧間誰知息心處香火老僧閒

次韻約諸君遊長干寺

寺按郡東南僧嘗為我談初因晉大士來獲古靈龕

晉時

有沙門惠達至金陵長干獲古佛塔因于其地建佛刹
後代廢撤至天禧中僧惟政乞重建塔寺俱蒙賜額

歷世名空在重興德乃堪先朝賜新額此地建精藍億

載扶皇統生民息戰函制仍存故里龍復止深潭九級

惟塗甃千梁盡架楠亭臺各軒豁巖谷更空豁殿角芝

成玉

殿柱嘗有芝草

松稍露隊甘

松林每有甘露

穴棲多禮龕池怪集

神龍可愛臨岡曲何人結草庵欲來尋隱逸誰與共歡

酣念往須勤到

來詩有念往會高枕之句

登高已舊諳

予累登絕頂

低頭

小城市舉目遍村嵐靜境由茲達塵容却自慙常思真

趣響可抑俗饕貪宇宙開懷適江山極望涵相邀幸多

暇命駕即追參

同賦山寺郁李花

小樹扶疎若剪裁新英濃淡對山齋青紅相間垂羅帶
華葉同開綴寶釵未必無言芳徑列須看成實翠珠排
禪扃掩映情多感藥譜標題品最佳衆卉分敷爭欲並
三春顏色此誰偕誰憐寂寞遊觀少便與移根向玉堦
丘林諸君以春雪三絕見寄走賦長句奉酬

彼美春工用意多剪裁瓊藥綴庭柯妍辭重識梁園賦

寡和還推郢國歌莫嘆餘花皆慘悴共看修栢自婆娑
尊前謾愛風光好不見山陰泛棹過

來篇有惜花之句

次韻江南感事

京洛倦遊後江南感慨多壯懷傷歲月醉眼小山河無
路通談說窮年謾揣摩知音如有遇終采擊轅歌

春日會飲懷丘思同林成之作四首

濁酒澆腸遣旅懷春宵常苦漏聲催坐中不見丘夫子
明月無光厭舉杯

次林韻

二月中和氣序均酒酣偏覺長精神之人歡會何稀闊
惆悵尊前更惜春

又和前韻

詩論心膽見天真酒逐羈懷若有神一夕所思惟我友
四時最樂是熙春

又次林韻

右持卮酒左持螯慷慨酣歌憶藉糟因想良交成不寐

清談終夕未為高

景德寺飲會丘思同作述懷詩兼紀一席之事見

約同賦輒次元韻

瀕江多勝宇茲地更推高結友為文會開樽較飲豪春
華今始盛聖代况親遭美景堪行樂雄談任叫號數家
供法饌百竿和春醪異味頻登俎良庖旋奏刀盤豐介
象鱸手把畢生螯極量觚并榼忘形甕與槽憐君皆曠
達獨我嘆徒勞俗狀區區外剛腸漸漸熬壯心雖不屈

讒口亦奚逃。感寓嘗懷古。愁來幾悼騷。宦塗蝸鬪角。世事蝟森毛。自得猶千慮。誰能挫一毫。無煩惡蠅點。須擬效龍韜。暫適惟詩酒。難兼是燕敖。縱歡忘倦厭。論契甚堅牢。峻節凌修幹。清風遏怒濤。就賢知不倦。營道豈云叨。此席今誰繼。知音盡俊髦。

和惟晤師遊鶴林寺寄穎長老

黃鵠山前古梵宮。參差樓殿倚巖中。羣峯重疊圍松徑。三伏嬉遊愛竹風。牛首禪宗懷馬素。

寺實馬素舊居

襄陽耆舊

憶龐翁

潁谷隱
門人

長思勝會真幽適誰使句嬰不與同

和刁節推郊居寄說晤二詩僧

勸賦從軍詠式微山齋重此理松扉春來園圃朱櫻遍
霜後盤殮綠芋肥瓶錫時邀高士駕臺緇多學野人衣
白蓮詩社方求友喜得支公與共歸

又和月夜理笛答晤見寄

聞說羌戎出塞行征人纔聽淚交橫三秋霜氣先時至
萬里鄉心半夜驚子野踞床思逐弄李長臥鄔亦牽情

關終更想關山月不惜新辭記舊聲

送惟晤遊廬山

飛錫指湓城秋風一衲輕溪雲隨晚渡嶺月伴晨征
思登臨發空談舉動明他時二林會名字繼融生

送沈太博倅滑臺

早歲淮陽宰邑初相君連上薦能書新從墨綬諸侯國
便領油泥別駕輿東郡提封今輔屏南都接軫舊鄉閭
優游樂職人應羨官便家榮兩莫如

次韻王伯益同年留別二首

桂籍昔叨聯署等蓮帷今幸接芳塵
塤簫契合均天屬金石交深過古人
直向歲寒期茂悅肯同時俗論甘辛
優游且作江南令惠愛於民此最親

再次前韻

從宦飄飄九見春共嗟名跡尚埃塵
相逢梁苑留趨幕不鄙池陽去長人
蚤向文科分甲乙嘗於命歷校庚辛
窮通定分非嬰慮惟有交情久益親

伯益生于辛亥予值次庚申嘗共考

術者所言
休咎多驗

下巡檢重建頻節堂

棟宇更新構亭名即舊規和容君子志歌闋大夫儀
官政搜兵暇賓賢命席時弦開秋月滿矢落曉星馳
疊中朋籌勝交醕飲樹移連輦呈畫的急管送金卮
更得蕭齋榜重看沈璧詩思勤主人意雅志最相宜

和刁推官蓼花二首

烟雨寒塘外蕭條廣隰中花逢秋至盛人愛水邊紅
碎

纈排霜葉纖凝拂露叢尊疊不見賞留得伴溪翁
蓮踈菊未破野艷獨敷榮濯水紅纓細鋪園步障平露
寒偏發色風勁不摧莖採掇聊供餌丹房助氣清

次韻簽判張太博移竹

梁苑有脩竹移來正得時新開一齋館分植兩軒墀
碎青金影纖圓碧玉枝物應人共美性與地兼宜漸喜
聲成韻母傷色暫衰寧因惡土變自與好風期窻闥常
相對闌干不用施看憐朝露爽坐覺晝陰遲擬富非侯

等親隣見鳳姿燕杯留几席畫筆置藩籬護長防將折
刪枯欲更滋破憂談將解化恐誤仙騎節聳蛟螭骨苞
翻虎豹皮竿長終勁挺根困任離披肯顧柯亭賞休思
渭水持吟餘毫亦健灌罷器頻欹戴譜須書此淇園未
羨之七賢嘗伴侶六逸重猶夷緬繼斯人躅如吹仲氏
簾蕭然發清思賴爾作良知

再和倒韻

新值蒼筤竹欣欣若感知日陰紛展蓋風韻巧吹簾幸

對人瀟洒兼依地坦夷二年官此者一日可忘之抱節
疎仍密交柯挺復欹叢生相友善特立甚矜持長處苔
微破看來露亦披鳳姿聊側翅蛇變但存皮莫作恂兵
伐留為介杖騎雪霜饒欲冒雨露已先滋初見猶齊架
俄驚漸出籬中虛緣物性外勁是天姿比畝雖云少成
林亦未遲廟丘當見採枯羽豈勞施鵲尾冠須製鸛鷀
食可期拂雲思栢悅盈畹笑蘭衰任土前書貴名園此
地宜縱難聽解管肯學唱巴枝既許親齋几寧辭局跬

墀更煩勤愛護有用在他時

次韻簽判梁寺丞阻水見寄

京府偕趨幕彌年接坐隅
駑駘攀驥足魚目混驪珠
風誼敦貪薄吹噓變朽枯
交親齊魯衛政事擬阿蒲
契合寧容間情通不鄙無
邀歡困萍蟻較味賸尊鱸
氣盛吞雲夢文雄獵具區
報投均縞紵應和念簾竿
巢閣行觀鳳為裘佇薦狐
世家傳鵲瑞職業在鴻都
聳壑方騰幹乘風好縱鱸
一飛嘗得志平步即夷塗
見比親瓊樹清

如隱玉壺終當拾青紫詎止學盤盂少別如旬日相望
似五湖荒郊逢轍涸激水待雲膚窟穴增蛇鼠腥臊惡
蚋蛄尊思孔北海釜嘆范萊蕪始見生冀魄俄驚遶樹
烏初猶甘杞菊久漸厭梁菰晝詠依依柳宵看歷歷榆
晨興常過午朝膳每通晡閒逸輸吾子馳驅屬鄙夫無
因隨李郭長日想田蘇沙漲舟猶膠去聲河流軌不濡行
郵纔咫尺命駕只須臾坐俟聆金玉來應笑硤硤多慚
昏鈍棗難慕湛精酬安得生雙翼徒然處櫛株重吟贈

我句足以豁蒙愚

謝太傅杜相公惠吳柑

任土吳邦果分甘故相庭纍纍朱實爛馥馥蜜筒馨玉
液三重釀神丹九鍊形盤中堆火齊案上鬪銅釘玩比
韓嫣彈飧勝楚子萍瓊津融不竭塵慮滌還醒近比瓜
稱此休誇李似瓶南樓今匪貴東望亦虛靈盛乃長洲
苑傳之大禹經秋包千樹富霜葉一林青薦味同飴露
淪輝信景星祖園輸歲賦守吏占官丁貢罷中都府供

先綠野局緘封重篚襲道里百郵亭想憶金華宴須傾
縹爰醺同黎資可口與棗助延齡豈意殊方物頻霑俗
吏廳食珍時有媿拜賜敢遑寧顧乏齊瑤報宜追戴帶
銘永言難紀美應念思飄零

太傅相公以梅聖俞寄和建茶詩垂示俾次前韻
近來不貴蜀吳茶為有東溪早露芽二月製成輸御府
經時猶未到人家太官供罷頒三吏東閣開時咏九華
從此閩鄉益珍尚佳章奇品兩相誇

送句判官赴大理詳斷

廷尉咨賢佐讞刑辟書連上得翹英時推黃霸持平久
衆伏兒寬定奏成尺竹汎疑資審効惠文彈治要詳精
從來法吏多陰德勉務哀矜助聖明

府尹歐陽公以臨書智信篇為貺謹以長句酬謝
八法能工世罕精帥鈴多暇錄遺經言稱智信文母害
體具真行筆不停勢似公權題殿壁心希逸少寫黃庭
下僚何幸蒙垂贈循覽留為座右銘

次韻簽判太博謝府公新詩墨迹

幕府雍容但省文筆精詩格兩難倫
臨池得法毫端健擊鉢成篇藻思新
征虜雅歌追樂事蘭亭賡唱掩芳塵
梁王賓友鄒枚在末至慚非賦雪人

次韻和宣甫叔父遷謫過都見寄

解組從戎五筦城壯謀期欲盪蠻腥
數奇不意同飛將肺腑何因學衛青
報國有心猶慷慨謫官無悶但沈冥
竹林此日重相過高論時欣側耳聽

宣甫以枰櫚茶刷見惠繼之以詩依韻奉和

裝橐分餘具茶筒使拂塵製時工匪易得處賞尤頻常
與輪槽並宜為焙匣珍齋中延客語供辦未應貧

宣甫宿約見過既而不至翌日有詩為示謹次元

韻

夙昔成嘉約朝來不見過出門非有礙掩室迓多魔咫尺且猶爾分攜將奈何徘徊延望久雲際待金波

宣甫隨行有端石茶匣甚佳道中為僕夫所損某

見之謂微瑕無傷尋蒙送示有二絕句依韻拜答
物重齋輕豈易持何時登頓損瑰奇曾為什襲緹巾寶
一見寒姿不忍遺

鎬鑿圭角制尤精豈為微瑕用便輕且賞巖珍終耿介
休思人事有虧成

蘇魏公文集卷六